



Terenga 4: Hōtaka 34 - hei / kia

He Mihi

Kei ngā teoteo, kei ngā manu tute o te wao, topaki mai ki te kāhekoheko o Ako, kia kurupākara ai te ngahere i te tiotio, i te ketekete, i te waraki o ō tātou reo.

Hei Mahi Whakarongo

He waiata te kaupapa o te kiriata poto o te rangi nei. Anei ngā pātai hei whakautu mā koutou i a koutou e whakarongo ana.

1. E whia ngā manu rerekē kei roto i te waiata nei?
2. Ā whea rangona ai te tūi e tangi ana, hei tā te waiata?
3. Me 'a', me 'o' rānei te tangi ka puta i te manu?

Kia whakarongo ake tātou ki ngā reo o te kapa o Te Aho Koopu.

He Whakamārama

E titiro ana tātou ki ngā pū 'hei' me 'kia' i te rangi nei i te mea i ētehi wā ka pōhēhē te ākonga he rite tonu te tikanga o ngā kupu e rua nei. Tirohia ngā ture e hāngai ana ki ēnei pū:

- Hei + hāngū ✗ [Anei te naihi hei tapahia i te mīti. ✗ Anei te naihi hei tapahi i te mīti. ✓]
- kia + hāngū ✓ [Anei te pukapuka kia pānuitia e koutou. ✓]
- ...ki te + hāngū ✗ [He pai ki te kitea i a koe. ✗ He pai te kite i a koe ✓]

Hei Mahi

Whiriwhirihia te pū 'hei', te pū 'kia' rānei hei whakaoti i ēnei rerenga:

1. Tīkina he pēke ____ hari i ō taputapu.
2. Koinā ngā kākahu ____ horoia.
3. Tukuna tō reo ____ whakamataara i te iwi.
4. Kāore āku kōrero ____ āpiti atu.
5. Kua rite au ____ whakarākeihia.

Whakautu:

1. hei
2. kia
3. hei
4. hei
5. kia